

# ॥ तैत्तिरीय संहिता ॥

## ॥ तृतीयः प्रश्नः ॥

### ॥ तैत्तिरीयसंहितायां द्वितीयकाण्डे तृतीयः प्रश्नः ॥

आदित्येभ्यो भुवद्वच्चक्षुरुं निर्वपेद्भूतिकाम आदित्या वा एतं  
भूत्यै प्रति नुदन्ते योऽलं भूत्यै सन्भूतिं न प्राप्नोत्यादित्यानेव  
भुवद्वतः स्वेन भागधेयेनोप धावति त एवैनं भूतिं गमयन्ति  
भवत्येवाऽऽदित्येभ्यो धारयद्वच्चक्षुरुं निर्वपेदपरुद्धो वाऽपरुध्यमानो  
वाऽऽदित्या वा अपरोद्धार आदित्या अवगमयितार आदित्यानेव  
धारयद्वतः- (१)

स्वेन भागधेयेनोप धावति त एवैनं विशि दाध्रत्यनपरुध्यो  
भवत्यदितेऽनु मन्यस्वेत्यपरुध्यमानोऽस्य पदमा ददीतेयं  
वा अदितिरियमेवास्मै राज्यमनु मन्यते सत्याशीरित्याह  
सत्यामेवाऽऽशिषं कुरुत इह मन इत्याह प्रजा एवास्मै समनसः  
करोत्युप प्रेतं मरुत - (२)

सुदानव एना विशपतिनाभ्यमुं राजानमित्याह मारुती वै  
विद्भ्यो विशपतिर्विशैवेनं राष्ट्रेण समर्धयति यः परस्ताद्भाम्यवादी  
स्यात्तस्य गृहाद्विहीना हरेच्छुक्लाः कृष्णाःश्च वि चिनुयाद्ये शुक्लाः  
स्युस्तमादित्यं चरुं निर्वपेदादित्या वै देवतया विद्विशमेवाव गच्छ-

(३)

त्यवंगतास्य विडनवगतः राष्ट्रमित्याहुर्ये कृष्णाः स्युस्तं वारुणं  
चरुं निर्वपेद्वारुणं वै राष्ट्रमुभे एव विशं च राष्ट्रं चाव गच्छति यदि  
नावगच्छेदिममहमादित्येभ्यो भागं निर्वपाम्यामुष्मादमुष्यै विशो-  
ऽवगन्तोरिति निर्वपेदादित्या एवैनं भागधेयं प्रेप्सन्तो विशमव (४)

गमयन्ति यदि नावगच्छेदाश्वत्थान्मयूखान्त्सप्त मध्यमेषायामुप  
हन्यादिदमहमादित्यान्बध्नाम्यामुष्मादमुष्यै विशोऽवगन्तोरित्या-  
दित्या एवैनं बद्धवीरा विशमव गमयन्ति यदि नावगच्छेदेतमेवा-  
ऽऽदित्यं चरुं निर्वपेदिध्मेऽपि मयूखान्त्सप्त नह्येदनपरुध्यमेवाव  
गच्छत्याश्वत्था भवन्ति मरुतां वा एतदोजो यदश्वत्थ ओजसैव  
विशमव गच्छति सप्त भवन्ति सप्तगणा वै मरुतो गणश एव  
विशमव गच्छति॥ (५)

धारयद्वतो मरुतो गच्छति विशमवैतदष्टादश च॥ [१]

देवा वै मृत्योरबिभयुस्ते प्रजापतिमुपाधावन्तेभ्य एतां  
प्राजापत्याः शतकृष्णलां निर्वपत्तयैवैष्वमृतमदधाद्यो  
मृत्योर्बिभीयात्तस्मा एताम्प्राजापत्याः शतकृष्णलां निर्वपेत्प्रजा-  
पतिमेव स्वेन भागधेयेनोप धावति स एवास्मिन्नायुर्दधाति  
सर्वमायुरेति शतकृष्णला भवति शतायुः पुरुषः शतेन्द्रिय  
आयुष्येवेन्द्रिये (६)

प्रति तिष्ठति घृते भवत्यायुर्वै घृतममृतं ५ हिरण्यमायुश्चैवास्मां  
अमृतं च समीचीं दधाति चत्वारिचत्वारि कृष्णलान्यव द्यति  
चतुरवत्तस्यास्यां एकधा ब्रह्मण उप हृत्येकधैव यजमान  
आयुर्दधात्यसावादित्यो न व्यरोचत तस्मै देवाः प्रायश्चित्ति-  
मैच्छन्तस्मा एत ५ सौर्यं चरुं निरवपन्तेनैवास्मि (७)

त्रुचमदधुर्यो ब्रह्मवर्चसकामः स्यात्तस्मा एत ५ सौर्यं  
चरुं निर्वपेदमुमेवाऽऽदित्यः स्वेन भागधेयेनोप धावति स  
एवास्मिन्ब्रह्मवर्चसं दधाति ब्रह्मवर्चस्यैव भवत्युभयतो रुक्मौ भवत  
उभयत एवास्मिन्नुचं दधाति प्रयाजेप्रयाजे कृष्णलं जुहोति दिग्भ्य  
एवास्मै ब्रह्मवर्चसमव रुद्ध आग्नेयमष्टाकपालं निर्वपेत्सावित्रं  
द्वादशकपालं भूम्यै (८)

चरुं यः कामयेत हिरण्यं विन्देय हिरण्यं मोषं  
नमेदिति यदाग्नेयो भवत्याग्नेयं वै हिरण्यं यस्यैव हिरण्यं  
तेनैवैनद्विन्दते सावित्रो भवति सवितृप्रसूत एवैनद्विन्दते भूम्यै  
चरुर्भवत्यस्यामेवैनद्विन्दत उपैत ५ हिरण्यं नमति वि वा एष  
इन्द्रियेण वीर्येणर्ध्यते यो हिरण्यं विन्दत एता- (९)

मेव निर्वपेद्धिरण्यं वित्त्वा नेन्द्रियेण वीर्येण व्यृध्यत एतामेव  
निर्वपेद्यस्य हिरण्यं नश्येद्यदाग्नेयो भवत्याग्नेयं वै हिरण्यं यस्यैव  
हिरण्यं तेनैवैनद्विन्दति सावित्रो भवति सवितृप्रसूत एवैनद्विन्दति

भूम्यै चरुर्भवत्यस्यां वा एतन्नश्यति यन्नश्यत्यस्यामेवैनद्विन्दतीन्द्र-  
(१०)

स्त्वष्टुः सोममभीषहापिबुध्स विष्वङ्मार्च्छुध्स इन्द्रियेण  
सोमपीथेन व्यार्ध्यत स यदूर्ध्वमुदवमीत्ते श्यामाकां अभवन्ध्स  
प्रजापतिमुपाधावत्तस्मां एत९ सोमेन्द्र९ श्यामाकं चरुं  
निरवपत्तेनैवास्मिन्निन्द्रिय९ सोमपीथमदधाद्वि वा एष इन्द्रियेण  
सोमपीथेनार्ध्यते यः सोमं वमिति यः सोमवामी स्यात्तस्मां- (११)

एत९ सोमेन्द्र९ श्यामाकं चरुं निर्वपेत्सोमं चैवेन्द्रं च स्वेन  
भागधेयेनोप धावति तावेवास्मिन्निन्द्रिय९ सोमपीथं धत्तो नैन्द्रियेण  
सोमपीथेन व्यृध्यते यत्सौम्यो भवति सोमपीथमेवाव रुन्धे यदेन्द्रो  
भवतीन्द्रियं वै सोमपीथ इन्द्रियमेव सोमपीथमव रुन्धे श्यामाको  
भवत्येष वाव स सोमः (१२)

साक्षादेव सोमपीथमव रुन्धेऽग्नये दात्रे पुरोडाशमष्टाकपालं  
निर्वपेदिन्द्राय प्रदात्रे पुरोडाशमेकादशकपालं पशुकामोऽग्निरेवास्मै  
पशून्प्रजनयति वृद्धानिन्द्रः प्र यच्छति दधि मधु घृतमापो धाना  
भवन्त्येतद्वै पशूना९ रूप९ रूपेणैव पशूनव रुन्धे पञ्चगृहीतं भवति  
पाङ्गा हि पशवो बहुरूपं भवति बहुरूपा हि पशवः (१३)

समृद्धौ प्राजापत्यं भवति प्राजापत्या वै पशवः प्रजा-  
पतिरेवास्मै पशून्प्र जनयत्यात्मा वै पुरुषस्य मधु यन्मध्वग्नौ

जुहोत्यात्मानमेव तद्यजमानोऽग्नौ प्र दधाति पङ्क्तौ याज्यानुवाक्ये  
भवतः पाङ्क्तः पुरुषः पाङ्क्ताः पशव आत्मानमेव मृत्योर्निष्क्रीय  
पशूनव रुन्धे॥ (१४)

इन्द्रियंऽस्मिन्भूम्यां एतामिन्द्रः स्यात्तस्मै सोमो बहुरूपा हि पशव एकचत्वारिंशच्च॥ — [२]

देवा वै सत्रमासतर्द्धिपरिमितं यशस्कामास्तेषां सोमं  
राजानं यशं आर्च्छत्स गिरिमुदैत्तमग्निरनूदैत्तावग्नीषोमौ समभवतां  
ताविन्द्रो यज्ञविभ्रष्टोऽनु परैत्तावब्रवीद्याजयतं मेति तस्मा  
एतामिष्टिं निर्वपतामाग्नेयमष्टाकंपालमैन्द्रमेकादशकपालं सौम्यं  
चरुं तयैवास्मिन्तेज - (१५)

इन्द्रियम्ब्रह्मवर्चसमधत्तां यो यज्ञविभ्रष्टः स्यात्तस्मा एतामिष्टिं  
निर्वपेदाग्नेयमष्टाकंपालमैन्द्रमेकादशकपालं सौम्यं चरुं यदाग्नेयो  
भवति तेज एवास्मिन्तेन दधाति यदैन्द्रो भवतीन्द्रियमेवास्मिन्तेन  
दधाति यथसौम्यो ब्रह्मवर्चसं तेनाऽऽग्नेयस्य च सौम्यस्य चैन्द्रे  
समाश्लेषयेत्तेजश्चैवास्मिन्ब्रह्मवर्चसं च समीचीं (१६)

दधात्यग्नीषोमीयमेकादशकपालं निर्वपेद्यं कामो नोपनमेदा-  
ग्नेयो वै ब्राह्मणः स सोमं पिबति स्वामेव देवतां स्वेन भागधेयेनोप  
धावति सैवैनं कामेन समर्धयत्युपैनं कामो नमत्यग्नीषोमीयमष्टा-  
कपालं निर्वपेद्ब्रह्मवर्चसकामोऽग्नीषोमावेव स्वेन भागधेयेनोप  
धावति तावेवास्मिन्ब्रह्मवर्चसं धत्तो ब्रह्मवर्चस्यैव (१७)

भवति यदष्टाकपालस्तेनाऽऽग्नेयो यच्छामाकस्तेन सौम्यः  
 समृद्धौ सोमाय वाजिने श्यामाकं चरुं निर्वपेद्यः क्लैव्याद्विभीयाद्रेतो  
 हि वा एतस्माद्वाजिनमपक्रामत्यथैष क्लैव्याद्विभाय सोममेव  
 वाजिनं स्वेन भागधेयेनोप धावति स एवास्मिन्नेतो  
 वाजिनं दधाति न क्लीबो भवति ब्राह्मणस्पत्यमेकादशकपालं  
 निर्वपेद्भ्रामकामो - (१८)

ब्रह्मणस्पतिमेव स्वेन भागधेयेनोप धावति स एवास्मै  
 सजातान्प्र यच्छति ग्राम्येव भवति गुणवती याज्यानुवाक्ये भवतः  
 सजातैरेवैनं गुणवन्तं करोत्येतामेव निर्वपेद्यः कामयेत ब्रह्मन्विशं  
 वि नाशयेयमिति मारुती याज्यानुवाक्ये कुर्याद्ब्रह्मन्नेव विशं वि  
 नाशयति॥ (१९)

तेजः समीचीं ब्रह्मवर्चस्येव ग्रामकामस्त्रिचत्वारिंशच्च॥ [३]

अर्यम्णे चरुं निर्वपेत्सुवर्गकामोऽसौ वा आदित्योऽर्यमा-  
 र्यमणमेव स्वेन भागधेयेनोप धावति स एवैनं सुवर्गं  
 लोकं गमयत्यर्यम्णे चरुं निर्वपेद्यः कामयेत दानकामा मे  
 प्रजाः स्युरित्यसौ वा आदित्योऽर्यमा यः खलु वै ददाति  
 सोऽर्यमाऽर्यमणमेव स्वेन भागधेयेनोप धावति स एवा- (२०)

स्मै दानकामाः प्रजाः करोति दानकामा अस्मै प्रजा  
 भवन्त्यर्यम्णे चरुं निर्वपेद्यः कामयेत स्वस्ति जनतामियामित्यसौ

वा आदित्योऽर्यमाऽर्यमणमेव स्वेन भागधेयेनोप धावति स एवैनं  
तद्रमयति यत्र जिगमिषतीन्द्रो वै देवानामानुजावर आसीत्स  
प्रजापतिमुपाधावत्तस्मा एतमैन्द्रमानुषूकमेकादशकपालं नि- (२१)

रवपत्तेनैवैनमग्रं देवतानां पर्यणयद्बुध्रवती अग्रवती  
याज्यानुवाक्ये अकरोद्बुध्रादेवैनमग्रं पर्यणयद्यो राजन्यं आनुजावरः  
स्यात्तस्मा एतमैन्द्रमानुषूकमेकादशकपालं निर्वपेदिन्द्रमेव स्वेन  
भागधेयेनोप धावति स एवैनमग्रं समानानां परिणयति बुध्रवती  
अग्रवती याज्यानुवाक्ये भवतो बुध्रादेवैनमग्रं- (२२)

परिणयत्यानुषूको भवत्येषा ह्येतस्य देवता य आनुजावरः  
समृद्धौ यो ब्राह्मण आनुजावरः स्यात्तस्मा एतं बार्हस्पत्यमानुषूकं  
चरुं निर्वपेद्बृहस्पतिमेव स्वेन भागधेयेनोप धावति स एवैनमग्रं  
समानानां परिणयति बुध्रवती अग्रवती याज्यानुवाक्ये भवतो  
बुध्रादेवैनमग्रं परिणयत्यानुषूको भवत्येषा ह्येतस्य देवता य  
आनुजावरः समृद्धौ॥ (२३)

एव निरग्रमेतस्य चत्वारि च॥ [४]

प्रजापतेस्त्रयस्त्रिंशद्बुहितरं आसन्ताः सोमाय राज्ञे-  
ऽददात्तासां रोहिणीमुपेत्ता ईर्ष्यन्तीः पुनरगच्छन्ता अन्वेत्ताः  
पुनरयाचत ता अस्मै न पुनरददात्सोऽब्रवीदृतममीष्व यथा

समावच्छ उ॒पैष्याम्यथ॑ ते पुन॑र्दास्यामीति॒ स ऋ॒तमा॑मी॒त्ता अ॑स्मै  
पुन॑रददा॒त्तासा॑ ५ रोहि॒णीमे॒वोपै॑ (२४)

त्तं यक्ष्मं आर्च्छ॑द्राजानं॒ यक्ष्मं आर॑दिति॒ तद्रा॑जयक्ष्मस्य॒ जन्म॑  
यत्पापी॑यान॒भवत्तत्पा॑पयक्ष्मस्य॒ यज्जा॑याभ्योऽवि॒न्दत्त॑ज्जाये॒न्यस्य॑ य  
ए॒वमे॒तेषां॑ यक्ष्मा॑णां॒ जन्म॑ वेद॒ नैन॑मे॒ते यक्ष्मा॑ विन्दन्ति॒ स ए॒ता ए॒व  
न॑म॒स्यन्नुपा॑धाव॒त्ता अ॑ब्रुव॒न्वरं॑ वृणाम॒है समा॑वच्छ ए॒व न॒ उपा॑य  
इति॒ तस्मा॑ ए॒त- (२५)

मा॑दित्यं च॒रुं निर॑वप॒न्तेनै॒वैनं॑ पा॒पाथ्स्त्रामा॑दमुश्च॒न् यः  
पा॑पयक्ष्मगृ॒हीतुः॑ स्यात्तस्मा॑ ए॒तमा॑दित्यं च॒रुं निर्व॑पेदादित्या॒नेव  
स्वेन॑ भा॒गधे॒येनो॑प॒ धाव॑ति॒ त ए॒वैनं॑ पा॒पाथ्स्त्रामा॑न्मुश्चन्त्यमावा॒स्यायां॑  
निर्व॑पेदमु॒मेवैन॑मा॒प्याय॑मान॒मन्वा प्या॑ययति॒ नवो॑नवो भवति॒ जाय॑-  
मान॒ इति॑ पुरोनुवा॒क्या भ॑वत्यायु॒रेवास्मि॑न्तया॒ दधा॑ति॒ यमा॑दित्या  
अ॒श्शुमा॑प्यायय॒न्तीति॑ या॒ज्यैवैन॑मे॒तया॑ प्याययति॥ (२६)

ए॒वोपै॒तम॑स्मिन्त्रयो॑दश च॥

[५]

प्र॒जाप॑तिर्दे॒वेभ्यो॑ऽन्नाद्यं॒ व्यादि॑श॒त्सोऽब्र॑वीद्यदिमाँल्लो॒का-  
न॒भ्यति॑रि॒च्यातै॑ तन्ममा॑ऽस॒दिति॑ तदिमाँल्लो॒कान॒भ्यत्य॑रि॒च्यतेन्द्र॑ ५  
राजा॑नमिन्द्रम॒धिरा॑जमिन्द्रः॒ स्वरा॑जानं॒ ततो॑ वै स इ॒माँल्लो॒काः स्त्रे॒धा-  
दु॒ह॒त्तत्रि॑धातो॑स्त्रिधातु॒त्वय्यं॑ का॒मये॑ताऽन्नादः॒ स्या॒दिति॑ तस्मा॑ ए॒तं  
त्रि॑धातुं॒ निर्व॑पेदिन्द्रा॒य राज्ञे॑ पुरोडाश- (२७)



मेकादशकपालमिन्द्रायाऽधिराजायेन्द्राय स्वराज्ञेऽयं वा इन्द्रो  
 राजायमिन्द्रोऽधिराजोऽसाविन्द्रः स्वराडिमानेव लोकान्त्स्वेन  
 भागधेयेनोप धावति त एवास्मा अन्नं प्र यच्छन्त्यन्नाद एव भवति  
 यथा वत्सेन प्रत्तां गां दुह एवमेवेमाँल्लोकान्प्रत्तान्काममन्नाद्यं  
 दुह उत्तानेषु कपालेष्वधि श्रयत्ययातयामत्वाय त्रयः पुरोडाशा  
 भवन्ति त्रय इमे लोका एषां लोकानामास्या उत्तरउत्तरो  
 ज्यायाभवत्येवमिव हीमे लोकाः समृद्धौ सर्वेषामभिगमयन्नव  
 द्यत्यच्छम्बद्वारं व्यत्यासमन्वाहाऽनिर्दाहाय॥ (२८)

पुरोडाशत्रयः षड्विंशतिश्च॥

[६]

देवासुराः संयन्ता आसन्तां देवानसुरा अजयन्ते देवाः  
 पराजिग्याना असुराणां वैश्यमुपायन्तेभ्य इन्द्रियं वीर्यमपा-  
 क्रामत्तदिन्द्रोऽचायत्तदन्वपाक्रामत्तदवरुधं नाशक्रोत्तदस्मा-  
 दभ्यर्धोऽचरत्स प्रजापतिमुपाधावत्तमेतया सर्वपृष्ठयाऽयाजयत्त-  
 यैवास्मिन्निन्द्रियं वीर्यमदधाद्य इन्द्रियकामो - (२९)

वीर्यकामः स्यात्तमेतया सर्वपृष्ठया याजयेदेता एव देवताः  
 स्वेन भागधेयेनोप धावति ता एवास्मिन्निन्द्रियं वीर्यं दधति  
 यदिन्द्राय राथन्तराय निर्वपति यदेवाग्नेस्तेजस्तदेवाव रुन्धे  
 यदिन्द्राय बारहताय यदेवेन्द्रस्य तेजस्तदेवाव रुन्धे यदिन्द्राय  
 वैरूपाय यदेव सवितुस्तेजस्त- (३०)

दे॒वाव॑ रु॒न्धे॒ यदि॒न्द्रा॒य वैरा॒जाय॒ यदे॒व धा॒तुस्तेज॒स्तदे॒वाव॑ रु॒न्धे॒  
 यदि॒न्द्रा॒य शा॒क॒राय॒ यदे॒व म॒रुता॑ तेज॒स्तदे॒वाव॑ रु॒न्धे॒ यदि॒न्द्रा॒य  
 रैव॒ताय॒ यदे॒व बृ॒ह॒स्पते॒स्तेज॒स्तदे॒वाव॑ रु॒न्ध ए॒ताव॑न्ति॒ वै तेजा॑ंसि॒  
 तान्ये॒वाव॑ रु॒न्ध उ॒त्ता॒नेषु॑ क॒पाले॒ष्वधि॑ श्रय॒त्यया॑तयाम॒त्वाय॒ द्वाद॑श॒  
 क॒पालः पुरो॑डाशौ - (३१)

भव॑ति वै॒श्वदे॒व॒त्वाय॑ सम॒न्तं प॒र्यव॑द्यति॒ सम॒न्तमे॒वेन्द्रि॑यं वी॒र्यं॑  
 यज॑माने दधाति॒ व्य॒त्यास॒मन्वा॒हानि॑र्दाहा॒याश्च॑ ऋष॒भो वृ॒ष्णिर्ब॒स्तः  
 सा दक्षि॑णा वृष॒त्वायै॒तयै॒व य॑जेताभि॒शस्य॑मान॒ ए॒ताश्चे॒द्वा अ॑स्य  
 दे॒वता॒ अन्न॑म॒दन्त्य॒दन्त्यु॑वे॒वास्य॑ मनु॒ष्याः॥ (३२)

इन्द्रियकामः सवितुस्तेजस्तत्पु॒रोडाशो॑ऽष्टात्रिंशच्च॥ [७]

रज॑नो॒ वै कौ॑णे॒यः क्र॑तुजितं॒ जान॑किं चक्षुर्व॒न्यम॒यात्त॒स्मा॑  
 ए॒तामि॒ष्टिं नि॒र॒वप॑द॒ग्रये॒ भ्राज॑स्वते॒ पुरो॑डाशम॒ष्टाक॑पालः सौर्यं  
 च॒रुम॒ग्रये॒ भ्राज॑स्वते॒ पुरो॑डाशम॒ष्टाक॑पालं॒ तयै॒वास्मि॒श्चक्षु॑र॒  
 दधा॑द्यश्चक्षुष्कामः॒ स्यात्त॒स्मा॑ ए॒तामि॒ष्टिं नि॒र्वपे॑द॒ग्रये॒ भ्राज॑स्वते  
 पुरो॑डाशम॒ष्टाक॑पालः सौर्यं च॒रुम॒ग्रये॒ भ्राज॑स्वते॒ पुरो॑डाश॒  
 म॒ष्टाक॑पालम॒ग्रेवै॑ चक्षुषा मनु॒ष्या वि॑ (३३)

प॒श्य॑न्ति॒ सूर्य॑स्य दे॒वा अ॒ग्निं चै॒व सूर्यं॑ च॒ स्वेन॑ भा॒गधे॒येनोप॑  
 धा॒वति॒ तावे॒वास्मि॒श्चक्षु॑र्ध॒त्तश्चक्षु॑ष्माने॒व भ॑वति॒ यदा॑ग्ने॒यौ भ॑वतश्चक्षु॑षी  
 ए॒वास्मि॒न्तत्प्र॑ति॒ दधा॑ति॒ यत्सौ॒र्यो ना॑सि॒कां तेना॑भितः सौर्यमा॑ग्ने॒यौ

भवत्स्तस्मादभितो नासिकां चक्षुषी तस्मान्नासिकया चक्षुषी विधृतं  
समानी याज्यानुवाक्यै भवतः समानं हि चक्षुः समृद्ध्या उदु त्यं  
जातवेदसं सप्त त्वा हरितो रथे चित्रं देवानामुदंगादनीकमिति  
पिण्डान्प्र यच्छति चक्षुरेवास्मै प्र यच्छति यदेव तस्य तत्॥ (३४)

वि ह्यष्टाविंशतिश्च॥ [८]

ध्रुवोऽसि ध्रुवोऽहं संजातेषु भूयासं धीरश्चेत्ता वसुविद्धुवो-  
ऽसि ध्रुवोऽहं संजातेषु भूयासमुग्रश्चेत्ता वसुविद्धुवोऽसि ध्रुवो-  
ऽहं संजातेषु भूयासमभिभूश्चेत्ता वसुविदामनमस्यामनस्य देवा  
ये संजाताः कुमाराः समनसस्तानहं कामये हृदा ते मां कामयन्तां  
हृदा तान्म आमनसः कृधि स्वाहाऽऽमनम- (३५)

स्यामनस्य देवा याः स्त्रियः समनसस्ता अहं कामये हृदा  
ता मां कामयन्तां हृदा ता म आमनसः कृधि स्वाहा वैश्वदेवीं  
साङ्ग्रहणीं निर्वपेद्दामकामो वैश्वदेवा वै संजाता विश्वानेव  
देवान्स्वेन भागधेयेनोप धावति त एवास्मै सजातान्प्र यच्छन्ति  
ग्राम्यैव भवति साङ्ग्रहणी भवति मनोग्रहणं वै संग्रहणम्मन एव  
संजातानां (३६)

गृह्णाति ध्रुवोऽसि ध्रुवोऽहं संजातेषु भूयासमिति परिधीन्परि  
दधात्याशिषमेवैतामा शास्तेऽथो एतदेव सर्वं सजातेष्वधि भवति  
यस्यैवं विदुष एते परिधयः परिधीयन्त आमनमस्यामनस्य देवा

इति॑ तिस्र॑ आहु॑तीर्जु॑होत्ये॒ताव॑न्तो॒ वै स॑जा॒ता ये म॒हान्तो॒ ये क्षु॑ल्ल॒का  
याः स्त्रिय॑स्ताने॒वाव॑ रुन्धे॒ त ए॑न॒मव॑रुद्धा॒ उप॑ तिष्ठन्ते॥ (३७)

स्वाहामनमसि सजातानां रुन्धे पञ्च च॥ [९]

यन्न॑वमै॒त्तन्न॑वनी॒तम॑भवद्यद॒सर्प॑त्तत्स॒र्पिर॑भवद्यद॒घ्निय॑त॒ तद्-  
घृ॒तम॑भवद्द॒श्विनोः॑ प्रा॒णोऽसि॑ तस्य॑ ते दत्ता॑ ययोः॑ प्रा॒णोऽसि॑  
स्वाहेन्द्र॑स्य प्रा॒णोऽसि॑ तस्य॑ ते ददातु॒ यस्य॑ प्रा॒णोऽसि॑ स्वाहा॑  
मि॒त्रावरु॑णयोः प्रा॒णोऽसि॑ तस्य॑ ते दत्ता॑ ययोः॑ प्रा॒णोऽसि॑ स्वाहा॑  
विश्वे॑षां दे॒वानां॑ प्रा॒णोऽसि॑ (३८)

तस्य॑ ते ददतु॒ येषां॑ प्रा॒णोऽसि॑ स्वाहा॑ घृ॒तस्य॑ धारा॑म॒मृत॑स्य॒  
पन्था॑मिन्द्रे॒ण द॒त्ताम्प्र॑य॒ताम्मु॑रुद्धिः। तत्त्वा॒ विष्णुः॑ पर्य॑पश्य॒त्तत्त्वे॒डा  
गव्यै॑रयत्। पा॒वमा॑नेन॒ त्वा स्तोमे॑न॒ गाय॑त्रस्य॒ वर्त॑न्योपा॒शोर्वी॑र्येण॒  
दे॒वस्त्वा॑ सवि॒तोऽसृ॑जतु जी॒वात॑वे जी॒वन॑स्यायै॒ बृह॑द्रथन्त॒रयो॑स्त्वा  
स्तोमे॑न॒ त्रिष्टु॑भो॒ वर्त॑न्या शु॒क्रस्य॑ वी॒र्येण॑ दे॒वस्त्वा॑ सवि॒तोत् (३९)

सृ॒जतु॑ जी॒वात॑वे जी॒वन॑स्याया॒ अग्ने॑स्त्वा॒ मात्र॑या॒ जग॑त्यै  
वर्त॑न्याग्र॒यण॑स्य॒ वी॒र्येण॑ दे॒वस्त्वा॑ सवि॒तोऽसृ॑जतु जी॒वात॑वे  
जी॒वन॑स्याया॒ इ॒मम॑ग्र॒ आयु॑षे॒ वर्च॑से॒ कृधि॑ प्रि॒य रे॒तो वरु॑ण सोम  
राज॑न्। मा॒तेवा॑स्मा अदि॒ते श॑र्म यच्छु॒ विश्वे॑ दे॒वा जर॑दष्टि॒र्यथा॑सत्।  
अ॒ग्निरा॑युष्मा॒न्त्स व॑न॒स्पति॑भि॒रायु॑ष्मा॒न्तेन॒ त्वायु॑षायुष्मन्तं॒

करोमि॒ सोम॒ आयुष्मान्त्स ओषधीभिर्यज्ञ आयुष्मान्त्स  
दक्षिणाभिर्ब्रह्मायुष्मत्तद्वाह्नौरायुष्मद्देवा आयुष्मन्तस्तेऽमृतैर्न पितर  
आयुष्मन्तस्ते स्वधयायुष्मन्तस्तेन त्वायुषायुष्मन्तं करोमि॥ (४०)

विश्वेषां देवानां प्राणोऽसि त्रिष्टुभो वर्तन्या शुक्रस्य वीर्येण देवस्त्वां सवितोऽथोम

आयुष्मान्यश्च विंशतिश्च॥

[१०]

अग्निं वा एतस्य शरीरं गच्छति सोमं रसो वरुण  
एनं वरुणपाशेन गृह्णाति सरस्वतीं वाग्ग्राविष्णू आत्मा  
यस्य ज्योगामयति यो ज्योगामयावी स्याद्यो वा कामयेत  
सर्वमायुरिरियामिति तस्मा एतामिष्टिं निर्वपेदाग्नेयमष्टाकपालं  
सौम्यं चरुं वारुणं दशकपालं सारस्वतं चरुमाग्रावैष्णवमेका-  
दशकपालमग्नेरेवास्य शरीरं निष्क्रीणाति सोमाद्रसम् (४१)

वारुणेनैवैनं वरुणपाशान्मुञ्चति सारस्वतेन वाचं दधात्यग्निः  
सर्वा देवता विष्णुर्यज्ञो देवताभिश्चैवैनं यज्ञेन च भिषज्यत्युत  
यदीतासुर्भवति जीवत्येव यन्नवमैत्तन्नवनीतमभवदित्याज्यमवैक्षते  
रूपमेवास्यैतन्महिमानं व्याचष्टेऽश्विनोः प्राणोऽसीत्याहाश्विनौ वै  
देवानाम् (४२)

भिषजौ ताभ्यामेवास्मै भेषजं करोतीन्द्रस्य प्राणो-  
ऽसीत्याहेन्द्रियमेवास्मिन्नेतेन दधाति मित्रावरुणयोः प्राणोऽसीत्याह  
प्राणापानावेवास्मिन्नेतेन दधाति विश्वेषां देवानां प्राणोऽसीत्याह

वीर्यमेवास्मिन्नेतेन दधाति घृतस्य धाराममृतस्य पन्थामित्याह  
यथायजुरेवैतत्पावमानेन त्वा स्तोमेनेति (४३)

आह प्राणमेवास्मिन्नेतेन दधाति बृहद्रथन्तरयोस्त्वा  
स्तोमेनेत्याहौज एवास्मिन्नेतेन दधात्यग्नेस्त्वा मात्रयेत्याहाऽऽ-  
त्मानमेवास्मिन्नेतेन दधात्यृत्विजः पर्याहुर्यावन्त एवर्त्विजस्त  
एनम्भिषज्यन्ति ब्रह्मणो हस्तमन्वारभ्य पर्याहुरेकधैव यजमान  
आयुर्दधति यदेव तस्य तद्धिरण्यात् (४४)

घृतं निष्पिबत्यायुर्वै घृतममृतं हिरण्यममृतादेवायुर्निष्पिबति  
शतमानं भवति शतायुः पुरुषः शतेन्द्रिय आयुष्येवेन्द्रिये  
प्रति तिष्ठत्यथो खलु यावन्तीः समा एष्यन्मन्येत तावन्मानं  
स्यात्समृद्ध्या इममग्र आयुषे वर्चसे कृधीत्याहायुरेवास्मिन्वर्चो  
दधाति विश्वे देवा जरदष्टिर्यथासदित्याह जरदष्टिमेवैनं  
करोत्यग्निरायुष्मानिति हस्तं गृह्णात्येते वै देवा आयुष्मन्तस्त  
एवास्मिन्नायुर्दधति सर्वमायुरेति॥ (४५)

रसं देवानां स्तोमेनेति हिरण्यादसदिति द्वाविंशतिश्च॥ [११]

प्रजापतिर्वरुणायाश्वमनयत्स स्वां देवतामार्च्छत् पर्यदीर्यत्  
स एतं वारुणं चतुष्कपालमपश्यत्तं निरवपत्ततो वै स  
वरुणपाशादमुच्यत् वरुणो वा एतं गृह्णाति योऽश्वं प्रतिगृह्णाति

यावतोऽश्वान्प्रतिगृह्णीयात्तावतो वारुणाश्चतुष्कपालान्निर्वपेद्वरुणमेव  
स्वेन भागधेयेनोप धावति स एवैनं वरुणपाशान्मुञ्चति (४६)

चतुष्कपाला भवन्ति चतुष्पाद्व्यश्वः समृद्ध्या एकमतिरिक्तं  
निर्वपेद्यमेव प्रतिग्राही भवति यं वा नाध्येति तस्मादेव  
वरुणपाशान्मुच्यते यद्यपरं प्रतिग्राही स्यात्सौर्यमेककपालमनु  
निर्वपेदमुमेवाऽऽदित्यमुच्चारं कुरुतेऽपोऽवभृथमवैत्यप्सु वै  
वरुणः साक्षादेव वरुणमव यजतेऽपोनप्रीयं चरुम्पुनरेत्य  
निर्वपेदप्सुयोनिर्वा अश्वः स्वामेवैनं योनिं गमयति स एनं  
शान्त उप तिष्ठते॥ (४७)

मुञ्चति चरुं सप्तदश च॥ [१२]

या वामिन्द्रावरुणा यतव्या तनूस्तयेममंहसो मुञ्चतं या  
वामिन्द्रावरुणा सहस्र्या रक्षस्या तेजस्या तनूस्तयेममंहसो मुञ्चतं  
यो वामिन्द्रावरुणावग्नौ सामस्तं वामेतेनाव यजे यो वामिन्द्रावरुणा  
द्विपात्सु पशुषु चतुष्पात्सु गोष्ठे गृहेष्वप्स्वोषधीषु वनस्पतिषु  
सामस्तं वामेतेनाव यज इन्द्रो वा एतस्य (४८)

इन्द्रियेणापं क्रामति वरुण एनं वरुणपाशेनं गृह्णाति  
यः पाप्मनां गृहीतो भवति यः पाप्मनां गृहीतः स्यात्तस्मा  
एतामैन्द्रावरुणीम्पयस्यां निर्वपेदिन्द्र एवास्मिन्निन्द्रियं दधाति  
वरुण एनं वरुणपाशान्मुञ्चति पयस्यां भवति पयो हि वा

ए॒तस्मा॑द॒प॒क्राम॑त्यथैष पा॒प्मना॑ गृही॒तो यत्प॑य॒स्या भव॑ति॒ पय॑  
ए॒वास्मि॑न्तया॑ दधाति॒ पय॑स्या॒याम् (४९)

पुरो॒डाश॑मव॑ दधा॒त्यात्म॑न्वन्त॒मेवैनं॑ करोत्यथो॑ आ॒यत॑नवन्त॒मेव  
च॑तु॒र्धा व्यू॑हति दि॒क्ष्वेव॑ प्रति॑ तिष्ठति॒ पुनः॑ समू॒हति दि॒ग्भ्य ए॒वास्मै॑  
भे॒षजं॑ करोति॒ समू॒ह्याव॑ द्यति॒ यथावि॑द्धं निष्कृ॒न्तति॑ तादृ॒गेव॑ तद्यो  
वा॒मिन्द्रा॑वरुणाव॒ग्नौ साम॑स्तं वा॒मेते॑नाव॒ यज॒ इत्या॑ह॒ दुरि॑ष्ट्या  
ए॒वैन॑म्पाति॒ यो वा॑मिन्द्रावरुणा द्वि॒पाथ्सु॑ प॒शुषु॑ साम॑स्तं वा॒मेते॑नाव॒  
यज॒ इत्या॑हैताव॑ती॒र्वा आप॒ ओष॑धयो॒ वन॑स्पत॒यः प्र॒जाः प॒शव॑  
उपजी॒वनी॑या॒स्ता ए॒वास्मै॑ वरुणा॒शांनु॑ञ्चति॥ (५०)

ए॒तस्य॑ पय॒स्यायाम्पा॑ति॒ षड्विं॑शतिश्च॥ [१३]

स प्र॑ल॒वन्नि का॒व्येन्द्रं॑ वो वि॒श्वत॑स्परीन्द्रं॒ नरः॑। त्वं नः॑ सोम  
वि॒श्वतो॑ रक्षा॑ राजन्नघाय॒तः। न रि॑ष्येत्त्वाव॑तः॒ सखा॑। या ते॒ धामा॑नि  
दि॒वि या पृ॑थि॒व्यां या पर्व॑ते॒ष्वोष॑धीष्व॒प्सु। तेभि॑र्नो॒ विश्वैः॑ सु॒मना॑  
अहे॑ड॒न्नाज॑न्त्यसोम॒ प्रति॑ ह॒व्या गृ॑भाय। अ॒ग्नीषो॑मा॒ सवे॑दसा॒ सह॑ती  
वन॑तं॒ गिरः॑। सं दै॒वत्रा॑ ब॒भूव॑थुः। युवम् (५१)

ए॒तानि॑ दि॒वि रो॑च॒नान्य॑ग्निश्च॒ सोम॒ सक्र॑तू॒ अध॑त्तम्।  
युव॑ꣳ सिन्धूꣳ र॒भिषो॑स्तेर॒वद्या॑द॒ग्नीषो॑मा॒वमु॑ञ्चतं॒ गृभी॑तान्।  
अ॒ग्नीषो॑मा॒विम॑ꣳ सु मे॑ शृणु॒तं वृ॑षणा॒ हव॑म्। प्रति॑ सू॒क्तानि॑ हर्य॒तं  
भव॑तं॒ दा॒शुषे॒ मयः॑। आ॒न्यं दि॒वो मा॑त॒रिश्वा॑ जभा॒राम॑श्चाद॒न्यं परि॑



श्ये॒नो अ॒द्रेः॑। अ॒ग्नी॒षोमा॒ ब्रह्म॑णा वावृ॒धानो॑रुं य॒ज्ञाय॑ चक्रथुरु  
लो॒कम्। अ॒ग्नी॒षोमा ह॒विषः॑ प्र॒स्थित॑स्य वी॒तम् (५२)

हर्य॑तं वृष॒णा जु॒षेथा॑म्। सु॒शर्मा॑णा स्वव॑सा हि भू॒तम॑था  
धत्तं॑ यज॑मानाय॒ शं योः॑। आ प्या॑यस्व॒ सं ते॑। गु॒णानां॑ त्वा  
गु॒णप॑तिः॒ हवाम॑हे क॒विं क॑वी॒नामु॑प॒मश्र॑वस्तमम्। ज्ये॒ष्ठरा॑जं ब्रह्म॑णां  
ब्रह्म॑णस्प॒त आ नः॑ शृ॒ण्वन्नृ॑तिभिः॒ सीद॑ सा॒दन॑म्। स इ॒ज्जने॑न॒ स  
वि॒शा स जन्म॑ना॒ स पु॒त्रैर्वाज॑म्भर॒ते धना॑ नृभिः॒। दे॒वानां॑ यः  
पि॒तर॑मा॒विवा॑सति (५३)

श्र॒द्धाम॑ना ह॒विषा॒ ब्रह्म॑णस्प॒तिम्। स सु॒ष्टुभा॒ स ऋ॑क्ता  
गु॒णेन॑ व॒लः॑ रु॒रोज॑ फ॒लिगः॑ रवे॒ण। बृह॑स्पतिरु॒स्रिया॑ हव्य॒सूदः॑  
क॒नि॒क्रद॑द्वाव॑शतीरु॒दाज॑त्। मरु॑तो॒ यद्ध॑ वो दि॒वो या वः॑ शर्म॑।  
अ॒र्य॒मा या॑ति वृष॒भस्तु॑विष्म॒न्दा॒ता वसू॑नां पु॒रुहू॑तो अ॒रह॑न्।  
स॒हस्रा॑क्षो गो॒त्रभि॑द्वज्र॒बाहुर॑स्मासु॒ देवो॑ द्रवि॑णं दधातु। ये  
तेऽ॒र्यम॑न्ब॒हवो॑ दे॒व्यानाः॑ प॒न्थानः॑ (५४)

रा॒ज॒न्दि॒व आ॒चर॑न्ति। तेभि॑र्नो दे॒व महि॑ शर्म॑ यच्छु॒ शं न॑  
ए॒धि द्वि॑पदे॒ शं च॑तु॒ष्पदे॑। बु॒ध्राद॑ग्र॒मङ्गि॑रोभिर्गृ॒णानो॑ वि पर्व॑तस्य  
दृ॒हि॒तान्यै॑रत्। रु॒जद्रो॑धा॒सि कृ॑त्रिमा॒ण्येषा॑ः॒ सोम॑स्य॒ ता म॑द॒  
इन्द्र॑श्चकार। बु॒ध्राद॑ग्रेण॒ वि मि॑माय॒ मानै॑र्वज्रेण॒ खान्य॑तृण॒न्नदी॑नाम्।  
वृ॒थासृ॑जत्प॒थिभि॑र्दीर्घया॒थैः सोम॑स्य॒ ता म॑द॒ इन्द्र॑श्चकार (५५)

प्र यो जज्ञे विद्वां॑ अ॒स्य बन्धुं॑ वि॒श्वानि॑ दे॒वो जनि॑मा  
 विवक्ति। ब्रह्म॑ ब्रह्म॑ण॒ उज्ज॑भार॒ मध्या॑न्नी॒चादु॑च्चा स्व॒धया॑भि प्र  
 त॑स्थौ। म॒हान्म॒ही अ॑स्तभाय॒द्वि जा॒तो द्या॑ स॒द्य पार्थि॑वं च॒ रजः॑।  
 स बु॒ध्रादा॑ष्ट ज॒नुषा॑भ्यग्र॒म्बृह॑स्पतिर्दे॒वता॒ यस्य॑ स॒म्राट्। बु॒ध्राद्यो  
 अग्र॑म॒भ्यर्त्यो॑ज॒सा बृ॒हस्प॑ति॒मा वि॑वासन्ति दे॒वाः। भि॒नद्व॑लं वि  
 पुरो॑ दर्दरीति॒ कनि॑क्रद॒त्सुव॑र॒पो जि॑गाय॥ (५६)

[आदित्येभ्यो देवा वै मृत्योर्देवा वै स॒त्रम॑र्य॒म्णे प्र॒जाप॑ते॒स्त्रय॑न्त्रि॑शत्प्रजापतिर्दे॒वेभ्यो॑-  
 ऽन्नाद्य॑न्देवासुरास्तात्रज॒नो ऋ॒वोऽसि॑ यन्न॒वम॑ग्निं वै प्र॒जाप॑तिर्वरुणा॒या वा॑मिन्द्रावरुणा॒ सप्र॑त्नवच्चतुर्दश॥14॥  
 आ॒दि॒त्येभ्य॑स्त्वष्ट॒रस्मै दान॑कामा ए॒वावरु॑न्धेऽग्निं वै स॒प्रत्न॑वथ॒र्दश्चा॑शत्॥56॥ आ॒दि॒त्येभ्यः॑ सु॒व॒र॒पो जि॑गाय॥]

[यु॒व वी॒तमा॑ वि॒वांस॑ति॒ पन्था॑नो दी॒र्घया॑थैः सोम॑स्य॒ ता म॒द् इन्द्र॑श्चकार दे॒वा न॒व च॥[१४]]

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>